



PREZIDÉNSIA  
KONSELLU  
MINISTRUS  
VIII GOVERNUN KONSTITUSIONÁL



Gabinete  
Porta-Voz

## Komunikadu Imprensa

### Sorumutuk Konsellu Ministrus nian iha loron 10 fulan-marsu tinan 2021

Konsellu Ministrus hala'ó sorumutuk iha Ministériu Finansas, iha Dili no, aprova ona Proposta Lei ba **alterasaun dahuluk ba Lei n. 6/2016, loron 25 fulan-maiu, kona-ba Lei Resensiamentu Eleitorál nian**, ne'ebé apresenta husi Ministru Administrasaun Estatál, Miguel Pereira de Carvalho. Ho alterasaun ida-ne'e, ema ne'ebé ninia kartaun eleitorál lakon ka estraga dala tolu ka liu sei selu taxa ida bainhira trata kartaun foun. Atu garante seguransa ne'ebé maka'as liután iha resenseamentu eleitorál, prevee ona mós iha lei, possibilidade atu halo konfirmasaun dados sira ho Ministériu Finansas, aleinde ministériu sira ne'ebé previstu nanis ona. Sertidaun batizmu no sédula pesoál comunidade izlámika nian sei labele simu tan bainhira hakarak halo inskrisaun iha resenseamentu eleitorál no iha tan elementu seluk maka hatama iha kartaun eleitorál no iha baze dados resenseamentu eleitorál nian. Atu garante identifikasaun ne'ebé loloos kona-ba eleitór sira, prevee ona possibilidade atu rekolla dados biométriku sira hanesan dados identifikativu eleitór sira-nian.

Aprova ona mós Proposta Lei ba **alterasaun datoluk ba Lei n. 5/2006, loron 28 fulan-dezemburu, kona-ba Órgaun Administrasaun Eleitorál, ne'ebé Ministru Administrasaun Estatál mós maka apresenta**. Proposta Lei ne'e hakarak halo adekuasaun ba konteúdu husi diploma legál foun sira no ba espesifikasaun husi konteúdu ambíguu balu ne'ebé eziste, nune'e mós, atu asegura koordinasaun iha termu funsaun nian entre órgaun eleitorál rua, Komisaun Nasionál Eleisaun (CNE) no Sekretariadu Tékniku Administrasaun Eleitorál (STAE).

Hafoin apresentasaun husi Primeiru-Ministru, Taur Matan Ruak, kona-ba situaun epidemiológika iha Munisípiu Kovalima, Konsellu Ministrus delibera ona atu **loke serka sanitária ne'ebé aplika ba munisípiu ne'e, exetu iha Postu Administrativu Fatumean**, ne'ebé sei mantein to'ó loron 21 fulan-marsu. Servisu Administrasaun Públiku nian no eskola sira sei taka nafatin to'ó loron 13 fulan-marsu oinmai, tuir determinasaun husi membru Governu sira ne'ebé sai nu'udar responsavel ba área sira-ne'e.



Palácio do Governo,  
Avenida Presidente Nicolau Lobato,  
Dili, Timor-Leste



# PREZIDÉNSIA KONSELLU MINISTRUS

VIII GOVERNUN KONSTITUSIONÁL



Gabinete  
Porta-Voz

Konsellu Ministru mós delibera ona **alterasaun dahuluk ba Rezolusaun Governu nian n. 12/2021, loron 8 fulan-marsu, ne'ebé impoin serka sanitária no konfinamentu iha Munisípiu Dili**, to'o tuku 23:59 loron 15 fulan-marsu. Ho alterasaun ne'e mós bandu dezlokasaun liuhusi rai, tasi ka via aérea husi Munisípiu seluk mai Dili, exetu iha kazu hirak ne'ebé iha fundamentu forte ho razaun seguransa, saúde pública, umanitária ka seluk ne'ebé hatudu katak importante duni ba realizasaun interese públiku nian, ne'ebé hetan autorizasaun husi Ministériu Interiór. Halo mós klarifikasaun katak ba ema ne'ebé la halo tuir orden no instrusaun husi autoridade competente sira, sei assume responsabilidade kriminál, tuir Kódigu Penál. Durante vijénsia rezolusaun ne'e nian, suspende transporte koletivu tula pasajeiru nian sira. Ministru Koordenadór Asuntus Ekonómikus no Ministru Turizmu, Komérsiu no Industriál, liuhusi despaxu konjuntu, sei define atividade ekonómika no servisu saida de'it maka tenke taka no define regra fursionamentu nian ba atividade sira seluk ne'ebé maka bele fursiona nafatin.

Ikusliu, Ministru Koordenadór Asuntus Ekonómikus, Joaquim Amaral, no Sekretariu Estadu Ambiente, Demétrio do Amaral de Carvalho, halo apresentasaun ida ba Konsellu Ministrus kona-ba **Planu Adaptasaun Nasionál Timor-Leste ba risku klimátiku sira no ba kriasaun rezillénsia klimátika**. Planu ne'e apresenta medida lubun ida ne'ebé ninia objetivu maka atu hatán ba ameasa sira ne'ebé provoka husi alterasaun klimátika no hamenus impaktu husi vulnerabilidade nasional sira hanesan nivel tasi nian ne'eb'e sa'e, inundasaun, anin boot, udan maka'as, bailoron naruk no akesimentu global. **REMATA**



Palácio do Governo,  
Avenida Presidente Nicolau Lobato,  
Dili, Timor-Leste